

Naqqiut

Akissuteqaat 16. oktober 2019-imeersaq taarserpaa
(Akissuteqaat naalisarpoq naaneranilu ilassuteqarpoq)

Apersortittoqartillugu, akunnaallisoortoqartillugu, katittoqartillugu ataasiartumik immikkut matoqqasumik aaqqissuussinissamut imigassanik kimittuunik kimikittunillu neriniartarfinni, imerniartarfinni, akunnittarfinni il.il. ulluni sapaammiik sisamangornermut ullaassakkut nalunaaqutaq 04.00 sassaalliinissamut qinnuteqartoqarsinnaangornissaa anguniarlugu imigassamut inatsimmut allannguutissamik saqqummiusseqqullugit Naalakkersuisut peqquneqarnissaannik Inatsisartutaalajangiiffisassaattut siunnersuut. (Tassani ilaassapput ukiuni 25-ni, ukiuni 50-ni katiffissiornerit il.il.) peqatigiiffiit nalliuttorsiorneri, siulersuisut ataatsimiinneri, Inatsisartunut qinersineq, kommunalbestyrelsinut qinersineq il.il.
(Inatsisartunut ilaasortaq Malene Vahl Rasmussen, Demokraatit)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Siullermeerneqarnera

Naalakkersuisut Inatsisartunut ilaasortaq Malene Vahl Rasmussen qutsavigaat Inatsisartunut aalajangiiffisassatut imigassaq pillugu inatsimmut allannguutissatut siunnersuuteqarneranut. Demokraatit isumaat naapertorlugu allannguutip kingunerissavaa imigassanik sassaalliteqartarfiit ataasiaannartumik atuuttussamik akuersissummik qinnuteqaateqarsinnaasalernissaat, aaqqissuussinernut matoqqasunut atatillugu imigassamik sassaalliteqarsinnaanermut ulluni sapaammiit sisamangornermut nal. 04.00 tikillugu.

Ataasiaannartumik atuuttussamik akuersissummik peqaraanni, Imigassaq (imigassamut inatsit) Inatsisartut Inatsisaanni normu 35, 23. novemberi 2017-imeersumi, malittarisassaavoq nal. 24.00 tikillugu sassaalliteqartoqarsinnaasoq. Kommunalbestyrelsip sassaalliteqarnermut piffissarititaasoq immikkut akuersissuteqarnermigut tallimangornerni aamma arfininngornerni nal. 04.00-imut sivitsorsinnaavaa.

Ataasiaannartumik atuuttussamik akuersissut imigassaq pillugu inatsimmi § 2, imm. 5-imi imatut nassuiaassutigineqarpoq:

”[...] ataasiaannartumik atuuttussamik akuersissut” tassaavoq ataasiaannartumik tamanut ammasumik aaqqissuussamik ingerlatsinnermut atatillugu imigassamik aalakoornartortalinnik sassaalliinnermut akuersissut.”

Ataasiaannartumik atuuttussamik akuersissummik pissarsitinneqarnissamut aalajangiisuusoq tassaavoq, taassuma aaqqissuussinermut kikkunnit tamanit peqataaffigineqarsinnaasumut

atorneqarnissaa. Imigassaq pillugu inatsimmut oqaaseqaatinik pisoq kikkunnit tamanit peqataaffigineqarsinnaasoq nassuiaaserneqarpoq, imatut:

”Aaqqissuussineq kikkunnit tamanit peqataaffigineqarsinnaasoq tassaavoq tunngaviusumik kikkut tamarmik iserfigisinnaasaat. Tassani pingartuunngilaq aaqqissuussinermut kina ingerlatsisuunersoq, kisianni kikkut aaqqissuussinermut isersinnaanersut. Aaqqissuussineq atituumik aamma aalajangersagaanngitsunik sullinniagaqaruni soorlu assersuutigalugu sumiiffimmi aalajangersimasumi najugaqartunik, kiisalu isaarissami isilernermi ilaasortanngortoqarsinnaalluni, taava aaqqissuussineq taamaattoq kikkut tamat peqataaffigisinnaasaattut isigineqassaaq.

Taamaattorli aalajangersakkami pineqanngillat nammineerluni privatimik katerisimaarnerit, tassa imaappoq katerisimaarnerit privatimik isigineqartussatut ingerlanneqartut.”.

Tamanna imatut paasineqassaaq aaqqissuussinerit matoqqasut tassaasut privatimik katerisimaarnerit, katittorsiornerit, inuuissiortoornerit allallu tamakkua akuersissummik ataasiaannartumik atuuttussamik pissarsinissap nassuiaassutigineqarneranut ilaatinneqanngillat.

Taamaattumik Naalackersuisunit inassutigineqarpoq aalajangiiffigisassatut siunnersuutip ataatsimiititaliamit sukumiisumik suliarineqarnissaa.